


大般涅槃經

第十三

百廿三  
壹三

48006



元祿九年丙子二月日重修

皇圖鞏固 帝業綿昌

佛日增輝 懺輪常轉

山城州天安寺法金剛院置



大般涅槃經卷第十三

壹

北涼天竺三藏曇無讖奉 詔譯

大般涅槃經聖行品第七之三



佛告迦葉善哉善哉善男子善能諮問如來  
是義善男子一切衆生於下苦中橫生樂想是  
故我今所說苦相與本不異爾時迦葉菩薩白  
佛言如佛所說於下苦中生樂想者下  
下病下死下愛別離下求不得下怨憎會下五  
盛陰如是等苦亦應有樂世尊下生者所謂三  
惡趣中者所謂人中上生者所謂天上若復有  
人作如是問若於下樂生於苦想於中樂中生  
無苦樂想於上樂中生於樂想當云何答世尊

若下苦中生樂想者未見有人當受千罰初一下時已生樂想若不生者云何說言於下苦中而生樂想佛告迦葉如是如是如汝所說以是義故無有樂想何以故猶如彼人當受千罰受一下已即得脫者是人爾時便生樂想是故當知於無樂中忘生樂想迦葉言世尊彼人不以一下生於樂想以得脫故而生樂想迦葉是故我昔為釋摩男說五陰中樂實不虛也迦葉有三受三苦三受者所謂樂受苦受不苦不樂受三苦者所謂苦苦行苦壞苦善男子苦受者名為三苦所謂苦苦行苦壞苦餘二受者所謂行苦壞苦善男子以是因緣生死之中實有樂受

菩薩摩訶薩以苦樂性不相捨離是故說言一切皆苦善男子生死之中實無有樂但諸佛菩薩隨順世間說言有樂迦葉菩薩白佛言世尊諸佛菩薩若隨俗說是虛妄不如佛所說脩行善者則受樂報持戒安樂身不受苦乃至衆事以辨是爲最樂如是等經所說樂受是虛妄不

經十三

若是虛妄諸佛世尊久於無量百千萬億阿僧祇劫脩菩提道已離妄語今作是說其義云何佛言善男子如上所說諸受樂偈即是菩提道之根本亦能長養阿耨多羅三藐三菩提以是義故先於經中說是樂相善男子譬如世間所須資生能爲樂因故名爲樂所謂女色耽酒飲

酒上饌甘味渴時得水寒時遇火衣服瓔珞象  
馬車乘奴婢僮僕金銀琉璃珊瑚眞珠倉庫穀  
米如是等物世間所須能爲樂因是名爲樂善  
男子如是等物亦能生苦因於女人生男子苦  
憂愁悲泣乃至斷命因酒甘味乃至倉穀亦能  
令人生大憂惱以是義故一切皆苦無有樂相  
善男子菩薩摩訶薩於是八苦解苦無苦善男  
子一切聲聞辟支佛等不知樂因爲如是人於  
下苦中說有樂相唯有菩薩住於大乘大般涅  
槃乃能知是苦因樂因善男子云何菩薩摩訶  
薩住於大乘大般涅槃觀察集諦善男子菩薩  
摩訶薩觀此集諦是陰因緣所謂集者還愛於

有愛有二種一愛己身二愛所須復有二種未  
得五欲繫心專求既求得已堪忍專著復有三  
種欲愛色愛無色愛復有三種業因緣愛煩惱  
因緣愛苦因緣愛出家之人有四種愛何等爲  
四衣服飲食卧具湯藥復有五種貪著五陰隨  
諸所須一切愛著分別校計無量無邊善男子  
愛有二種一者善愛二不善愛不善愛者唯愚  
求之善法愛者諸菩薩求善法愛者復有二種  
不善與善求二乘者名爲不善求大乘者是名  
爲善善男子凡夫愛者名之爲集不名爲諦菩  
薩愛者名之實諦不名爲集何以故爲度衆生  
所以受生不以愛故而受生也迦葉菩薩白佛

言世尊如佛世尊於餘經中為諸眾生說業。因緣或說憍慢或說六觸或說無明為五盛陰而作因緣今以何義說四聖諦獨以愛性為五陰因佛讚迦葉菩薩善哉善哉善男子如汝所說諸因緣者非為非因但是五陰要因於愛善男子譬如大王若出遊巡大臣眷屬悉皆隨從愛亦如是隨愛行處是諸結等亦復隨行譬如膩衣隨有塵著著則隨住愛亦如是隨所愛處業結亦住復次善男子譬如濕地則能生芽愛亦如是能生一切業煩惱芽善男子菩薩摩訶薩住是大乘大般涅槃深觀此愛凡有九種一如債有餘二如羅刹女婦三如妙華莖中有



毒蛇纏之四如惡食性所不便而強食之五如淫女六如摩樓迦子七如瘡中瘕肉八如暴風九如彗星云何名爲如債有餘善男子譬如窮人負他錢財雖償欲畢餘未畢故猶繫在獄而不得脫聲聞緣覺亦復如是以有愛習之餘氣故不能得成阿耨多羅三藐三菩提善男子是名如債有餘善男子云何如羅刹女婦善男子譬如有人以羅刹女而爲婦妾是羅刹女隨所生子生已便噉子旣盡已復噉其夫善男子愛羅刹女亦復如是隨諸衆生生善根子隨生隨食善子旣盡復噉衆生令墮地獄畜生餓鬼唯除菩薩是名如羅刹女婦善男子云何如妙華

莖毒蛇纏之譬如有人性愛好華不見華莖毒  
蛇過患即便前捉捉已蛇螫螫已命終一切凡  
夫亦復如是貪五欲華不見是愛毒蛇過患而  
便受取即爲愛毒之所蝨螫命終墮於三惡道  
中唯除菩薩是名如妙華莖毒蛇纏之善男子  
云何所不便食而強食之譬如有人所不便食  
而強食之食已腹痛患下而死愛食亦爾五道  
衆生強食貪著以是因緣墮三惡道唯除菩薩  
是名所不便食而強食之善男子云何淫女譬  
如愚人與淫女通而彼淫女巧作種種諂媚現  
親悉棄是人所有錢財錢財既盡便復馳逐愛  
之淫女亦復如是愚人無智與之交通而是愛

女棄其所有一切善法善法既盡駈逐今墮三  
惡道中唯除菩薩是名淫女善男子云何摩樓  
迦子譬如摩樓迦子若鳥食已隨糞墮地或因  
風吹來在樹下即便生長纏繞縛束尼拘陀樹  
今不增長遂至枯死愛摩樓迦子亦復如是纏  
縛凡夫所有善法不令增長遂至枯滅既枯滅  
已命終之後墮三惡道唯除菩薩是名摩樓迦  
子善男子云何瘡中瘰肉如人久瘡中生瘰肉  
其人要當勤心療治莫生捨心若生捨心瘡瘰  
增長蟲疽復生以是因緣即便命終凡夫愚人  
五陰瘡痍亦復如是愛於其中而為瘰肉應當  
勤心療治愛瘰若不治者命終即墮三惡道中

唯除菩薩是名瘡中瘰肉善男子云何暴風霹  
如暴風能偃山移岳拔深根栽愛暴大風亦復  
如是於父母所而生惡心能拔大智舍利弗等  
無上深固菩提根栽唯除菩薩是名暴風善男  
子云何彗星霹如彗星出現天下一切人民飢  
饑病瘦嬰諸苦惱愛之彗星亦復如是能斷一  
切善根種子今凡夫人孤窮飢饉生煩惱病流  
轉生死受種種苦唯除菩薩是名彗星善男子  
菩薩摩訶薩住於大乘大般涅槃觀察愛結如  
是九種善男子以是義故諸凡夫人有苦無諦  
聲聞緣覺有苦有苦諦而無真實諸菩薩等解  
無苦是故無苦而有真諦諸凡夫人有集無

諦聲聞緣覺有集有集諦諸菩薩等解集無集  
是故無集而有真諦聲聞緣覺有滅非真菩薩  
摩訶薩有滅有真諦聲聞緣覺有道非真菩薩  
摩訶薩有道有真諦善男子云何菩薩摩訶薩  
住於大乘大般涅槃見滅見滅諦所謂斷除一  
切煩惱若煩惱斷則名為常滅煩惱火則名寂  
滅煩惱滅故則得受樂諸佛菩薩求因緣故故  
名為淨更不復受二十五有故名出世以出世  
故名為我常於色聲香味觸男女生住滅苦樂  
不苦不樂不取相貌故名畢竟寂滅真諦善男  
子菩薩如是住於大乘大般涅槃觀滅聖諦善  
男子云何菩薩摩訶薩住於大乘大般涅槃觀

道聖諦善男子譬如闇中因燈得見麤細之物  
菩薩摩訶薩亦復如是住於大乘大般涅槃因  
八聖道見一切法所謂常無常有爲無爲有衆  
生非衆生物非物苦樂我無我淨不淨煩惱非  
煩惱業非業實不實乘非乘知無知陀羅驃非  
陀羅驃求那非求那見非見色非色道非道解  
非解善男子菩薩如是住於大乘大般涅槃觀  
道聖諦迦葉菩薩白佛言世尊若八聖道是道  
聖諦義不相應何以故如來或說信心爲道能  
度諸漏或時說道不放逸是諸佛世尊不放逸  
故得阿耨多羅三藐三菩提亦是菩薩助道之  
法或時說言精進是道如告阿難若有人能勤

脩精進則得成於阿耨多羅三藐三菩提或時  
說言觀身念處若有繫心精勤脩習是身念處  
則得成於阿耨多羅三藐三菩提或時說言正  
定爲道如告大德摩訶迦葉夫正定者真實是  
道非不正定而是道也若入禪定乃能思惟五  
陰生滅非不入定能思惟也或說一法若人脩

集能淨衆生滅除一切憂悲苦惱逮得正法所  
謂念佛三昧或復說言脩無常想是名爲道如  
告比丘有能多脩無常想者能得阿耨多羅三  
藐三菩提或說空寂阿蘭若處獨坐思惟能得  
速成阿耨多羅三藐三菩提或時說言爲人演  
法是名爲道若聞法已疑網即斷疑網斷已則

得阿耨多羅三藐三菩提或時說言持戒是道  
如告阿難若有精進脩持禁戒是人則度生死  
大苦或時說言親近善友是名爲道如告阿難  
若有親近善知識者則具淨戒若有衆生能親  
近我則得發於阿耨多羅三藐三菩提心或時  
說言脩慈是道脩學慈者斷諸煩惱得不動處  
或時說言智慧是道如佛昔爲波闍波提比丘  
尼說姊妹如諸聲聞以智慧力能斷諸流諸漏  
煩惱或時如來說施是道如佛往昔告波斯匿  
王大王當知我於往昔多行惠施以是因緣今  
日得成阿耨多羅三藐三菩提世尊若八聖道  
是道諦者如是等經豈非虛妄若彼諸經非虛



妄者彼中何緣不說八聖道爲道聖諦若彼不  
說如來往昔何故錯謬然我定知諸佛如來久  
離錯謬爾時世尊讚迦葉菩薩善哉善哉善男  
子汝今欲知菩薩大乘微妙經典所有秘密故  
作是問善男子如是諸經悉入道諦善男子如  
我所說若有信道如是信道是信根本是能佐  
助菩提之道是故我說無有錯謬善男子如來  
善知無量方便欲化衆生故作如是種種說法  
善男子譬如良醫識諸衆生種種病源隨其所  
患而爲合藥并藥所禁唯水一種不在禁例或  
服薑水或甘草水或細辛水或黑石蜜水或阿  
摩勒水或尼波羅水或鉢書羅水或服冷水或

服熱水或蒲桃水或安石榴水善男子而是良  
醫善知衆生所患種種藥雖多禁水不在例如  
來亦爾善知方便於一法相隨諸衆生分別廣  
說種種名相彼諸衆生隨所說受受已脩習除  
斷煩惱如彼病人隨良醫教所患得除復次善  
男子如有一人善解雜語在大衆中是諸大衆  
熱渴所逼咸發聲言我欲飲水我欲飲水是人  
即時以清冷水隨其種類說言是水或言波尼  
或言鬱持或言紫利藍或言婆利或言波耶或  
言甘露或言牛乳以如是等無量水名爲大衆  
說善男子如來亦爾以一聖道爲諸聲聞種種  
而說從信根等至八聖道復次善男子譬如金

師以一種金隨意造作種種瓔珞所謂鉗鑲環  
釧釵鐺天冠髻印雖有如是差別不同然不離  
金善男子如來亦爾以一佛道隨諸衆生種種  
分別而爲說之或說一種所謂諸佛一道無二  
復說二種所謂定慧復說三種謂見慧智復說  
四種所謂見道脩道無學道佛道復說五種所  
謂信行道法行道信解脫道見倒道身證道復  
說六種所謂須陀洹道斯陀含道阿那含道阿  
羅漢道辟支佛道佛道復說七種所謂念覺分  
擇法覺分精進覺分喜覺分除覺分定覺分捨  
覺分復說八種所謂正見正思惟正語正業正  
命正精進正念正定復說九種所謂八聖道及

覺分復說八種所謂正見正思惟正語正業正  
命正精進正念正定復說九種所謂八聖道及  
信復說十種所謂十力復說十一種所謂十力  
大慈復說十二種所謂十力大慈大悲復說十  
三種所謂十力大慈大悲念佛三昧復說十六  
種所謂十力大慈大悲念佛三昧及佛所得三  
正念處復說二十道所謂十力四無所畏大慈  
大悲念佛三昧三正念處善男子是道一體如  
來昔日爲衆生故種種分別復次善男子譬如  
一火因可然故得種種名所謂木火草火糠火  
熬火牛馬糞火善男子佛道亦爾一而無二爲  
衆生故種種分別復次善男子譬如一識分別  
說六若至於眼則名眼識乃至意識亦復如是  
善男子道亦如是是一而無二如來爲化諸衆生

故種種分別復次善男子譬如一色眼所見者  
則名爲色耳所聞者則名爲聲鼻所嗅者則名  
爲香舌所嘗者則名爲味身所覺者則名爲觸  
善男子道亦如是一而無二如來爲欲化衆生  
故種種分別善男子以是義故以八聖道名道  
聖諦善男子是四聖諦諸佛世尊次第說之以  
是因緣無量衆生得度生死迦葉菩薩白佛言  
世尊昔佛一時在恒河岸尸首林中爾時如來  
取其樹葉告諸比丘我今手中所捉葉多一切  
因地草木葉多諸比丘言世尊一切因地草木  
葉多不可稱計如來所捉少不足言諸比丘我  
所覺了一切諸法如因大地生草木等爲諸衆

生所宣說者如手中菜卮爾時說如是言如  
來所了無量諸法若入四諦則爲已說若不入  
者應有五諦佛讚迦葉菩薩善哉善哉善男  
子汝今所問則能利益安隱快樂無量衆生善  
男子如是諸法悉以攝在四聖諦中迦葉菩薩  
復作是言如是等法若在四諦如來何故唱言  
不說佛言善男子雖復入中猶不名說何以故  
善男子知聖諦者有二種智一者中二者上中  
者聲聞緣覺智上者諸佛菩薩智善男子知諸  
陰苦名爲中智分別諸陰有無量相悉是諸苦  
非是聲聞緣覺所知是名上智善男子如是等  
義我於彼經竟不說之善男子知諸入者名之

為門亦名為苦是名中智分別諸入有無量相  
 悉是諸苦非諸聲聞緣覺所知是名上智如是  
 等義我於彼經亦不說之善男子知諸界者名  
 之為分亦名為性亦名為苦是名中智分別諸  
 界有無量相悉是諸苦非諸聲聞緣覺所知是  
 名上智善男子如是等義我於彼經亦不說之  
 善男子知色壞相是名中智分別諸色有無量  
 壞相悉是諸苦非諸聲聞緣覺所知是名上智  
 如是等義我於彼經亦不說之善男子知受覺  
 相是名中智分別諸受有無量覺相非諸聲聞  
 緣覺所知是名上智善男子如是等義我於彼  
 經亦不說之善男子知想取相是名中智分別

是想有無量取相非諸聲聞緣覺所知是名上  
智如是等義我於彼經亦不說之善男子知行  
作相是名中智分別是行無量作相非諸聲聞  
緣覺所知是名上智善男子如是等義我於彼  
經亦不說之善男子知識分別相是名中智分  
別是識無量知相非諸聲聞緣覺所知是名上  
智善男子如是等義我於彼經亦不說之善男  
子知愛因緣能生五陰是名中智一人起愛無  
量無邊聲聞緣覺所不能知能知一切衆生所  
起如是等愛是名上智如是等義我於彼經亦  
不說之善男子知滅煩惱是名中智分別煩惱  
不可稱計滅亦如是不可稱計非諸聲聞緣覺



所知是名上智如是等義我於彼經亦不說之  
善男子知是道相能離煩惱是名中智分別道  
相無量無邊所離煩惱亦無量無邊非諸聲聞  
緣覺所知是名上智如是等義我於彼經亦不  
說之善男子知世諦者是名中智分別世諦無  
量無邊不可稱計非諸聲聞緣覺所知是名上  
智如是等義我於彼經亦不說之善男子一切  
行無常諸法無我涅槃寂滅是第一義是名中  
智知第一義無量無邊不可稱計非諸聲聞緣  
覺所知是名上智如是等義我於彼經亦不說  
之爾時文殊師利菩薩摩訶薩白佛言世尊所  
說世諦第一義諦其義云何世尊第一義中有

世諦不世諦之中有第一義不如其有者即是一諦如其無者將非如來虛妄說耶善男子世諦者即第一義諦世尊若爾者則無二諦佛言善男子有善方便隨順衆生說有二諦善男子若隨言說則有二種一者世法二者出世法善男子如出世人之所知者名第一義諦世人知者名爲世諦善男子五陰和合稱言某甲凡夫衆生隨其所稱是名世諦解陰無有某甲名字離陰亦無某甲名字出世之人如其姓相而能知之名第一義諦復次善男子或復有法有名有實或復有法有名無實善男子有名無實者即是世諦有名有實者是第一義諦善男子如

我衆生壽命知見養育丈夫受者作者熱時之  
燄乾闥婆城龜毛兔角旋火之輪諸陰界入是  
名世諦苦集滅道名第一義諦善男子世法有  
五種一者名世二者句世三者縛世四者法世  
五者執著世善男子云何名世男女瓶衣車乘  
屋舍如是等物是名名世云何句世四句一偈  
如是等偈名爲句世云何縛世捲合繫結束縛  
合掌是名縛世云何法世如鳴槌集僧嚴鼓誡  
兵吹貝知時是名法世云何執著世如望遠人  
有染衣者生想執著言是沙門非婆羅門見有  
結繩橫係身上便生念言是婆羅門非沙門也  
是名執著世善男子如是名爲五種世法善男

子若有衆生於如是等五種世法心無顛倒如  
實而知是名第一義諦復次善男子若燒若割  
若死若壞是名世諦無燒無割無死無壞是名  
第一義諦復次善男子有八苦相名爲世諦無  
生無老無病無死無愛別離無怨憎會無求不  
得無五盛陰是名第一義諦復次善男子譬如  
一人多有所能若其走時則名走者或收刈時  
復名刈者或作飲食名作食者若治材木則名  
工匠鍛金銀時言金銀師如是有一人多名字  
法亦如是其實是一而有多名依因父母和合  
而生名爲世諦十二因緣和合生者名第一義  
諦文殊師利菩薩摩訶薩白佛言世尊所言實

諦其義云何佛言善男子言實諦者名曰真法  
善男子若法非真不名實諦善男子實諦者無  
顛倒無顛倒者乃名實諦善男子實諦者無有  
虛妄若有虛妄不名實諦善男子實諦者名曰  
大乘非大乘者不名實諦善男子實諦者是佛  
所說非魔所說若是魔說非佛說者不名實諦  
善男子實諦者一道清淨無有二也善男子有  
常有樂有我有淨是則名爲實諦之義文殊師  
利白佛言世尊若以真實爲實諦者真實之法  
即是如來虛空佛性若如是者如來虛空及與  
佛性無有差別佛告文殊師利有苦有諦有實  
有集有諦有實有滅有諦有實有道有諦有實

善男子如來非苦非諦是實虛空非苦非諦是實佛性非苦非諦是實文殊師利所言苦者為無常相是可斷相是為實諦如來之性非苦非無常非可斷相是故為實虛空佛性亦復如是復次善男子所言集者能令五陰和合而生亦名為苦亦名無常是可斷相是為實諦善男子如來非是集性非是陰因非可斷相是故為實虛空佛性亦復如是善男子所言滅者名煩惱滅亦常無常二乘所得名曰無常諸佛所得是則名常亦名證法是為實諦善男子如來之性不名為滅能滅煩惱非常無常不名證知常住無變是故為實虛空佛性亦復如是善男子道

者能斷煩惱亦常無常是可脩法是名實諦如  
來非道能斷煩惱非常無常非可脩法常住不  
變是故爲實虛空佛性亦復如是復次善男子  
言真實者即是如來如來者即是真實真實者  
即是虛空虛空者即是真實真實者即是佛性  
佛性者即是真實文殊師利有苦有苦因有苦  
盡有苦對如來非苦乃至非對是故爲實不名  
爲諦虛空佛性亦復如是苦者有爲有漏無樂  
如來非有爲非有漏湛然安樂是實非諦文殊  
師利白佛言世尊如佛所說不顛倒者名爲實  
諦若爾者四諦之中有四倒不如其有者云何  
說言無有顛倒名爲實諦一切顛倒不名爲實

佛告文殊師利一切顛倒皆入苦諦如諸衆生  
有顛倒心名爲顛倒善男子譬如有人不受父  
母尊長教勅雖受不能隨順脩行如是人等名  
爲顛倒如是顛倒非不是苦即是苦也文殊師  
利言如佛所說不虛妄者即是實諦若爾者當  
知虛妄則非實諦佛言善男子一切虛妄皆入  
苦諦如有衆生欺誑於他以是因緣墮於地獄  
畜生餓鬼如是等法名爲虛妄如是虛妄非不  
是苦即是苦也聲聞緣覺諸佛世尊遠離不行  
故名虛妄如是虛妄諸佛二乘所斷除故故名  
實諦文殊師利真如佛所說大乘是實諦者當  
知聲聞辟支佛乘則爲不實佛告文殊師利彼



二乘者亦實不實聲聞緣覺斷諸煩惱則名爲  
實無常不住是變易法名爲不實文殊師利言  
如佛所說若佛所說名爲實者當知魔說則爲  
不實世尊如魔所說聖諦攝不佛言文殊師利  
魔所說者二諦所攝所謂苦集凡是一切非法  
非律不能令人而得利益終日宣說亦無有人  
見苦斷集證滅脩道是名虛妄如是虛妄名爲  
魔說文殊師利言如佛所說一道清淨無有二  
者諸外道等亦復說言我有一道清淨無二若  
言一道是實諦者與彼外道有何差別若無差  
別不應說言一道清淨佛言善男子諸外道等  
有苦集諦無滅道諦於非滅中而生滅想於非

道中而生道想於非果中生於果想於非因中  
生於因想以是義故彼無一道清淨無二文殊  
師利言如佛所說有常有我有樂有淨是實義  
者諸外道等應有實諦佛法中無何以故諸外  
道輩亦復說言諸行是常云何是常可意不可  
意諸業報等受不失故可意者名十善報不可  
意者十不善報若言諸行悉無常者而作業者  
於此已滅誰復於彼受果報乎以是義故諸行  
是常殺生因緣故名爲常世尊若言諸行悉無  
常者能殺可殺二俱無常若無常者誰於地獄  
而受罪報若言定有地獄受報當知諸行實非  
無常世尊繫心專念亦名爲常所謂十年所念

乃至百年亦不妄失是故為常若無常者本所見事誰憶誰念以是因緣一切諸行非無常也世尊一切憶想亦名為常有入先見他人手脚頭項等相後時若見便還識之若無常者本相應滅世尊諸所作業以久脩習若從初學或經三年或經五年然後善知故名為常世尊算數之法從一至二從二至三乃至百千若無常者初一應滅初一若滅誰復至二如是常一終無有二以一不滅故得至二乃至百千是故為常世尊如讀誦法讀一阿含至二阿含乃至三四阿含如其無常所可讀誦終不至四以是讀誦增長因緣故名為常世尊瓶衣車乘如人負債

大地形相山河樹林藥木草菜衆生治病皆悉  
是常亦復如是世尊一切外道皆作是說諸行  
是常若是常者即是實諦世尊有諸外道復言  
有樂云何知也受者定得可意報故世尊凡受  
樂者必定得之所謂大梵天王大自在天釋提  
桓因毗紐天及諸人天以是義故名定有樂世  
尊有諸外道復言有樂能令衆生生求望故飢  
者求食渴者求飲寒者求煖熱者求涼極者求  
息病者求差欲者求色若無樂者彼何緣求以  
有求者故知有樂世尊有諸外道復作是言施  
能得樂世間之人好施沙門諸婆羅門貧窮困  
苦衣服飲食卧具醫藥象馬車乘末香塗香衆

華屋宅依山燈明作如是等種種惠施爲我後  
世受可意報是故當知決定有樂世尊有諸外  
道復作是言以因緣故當知有樂謂受樂者有  
因緣故名爲樂觸若無樂者何得因緣如無兔  
角則無因緣有樂因緣則知有樂世尊有諸外  
道復作是言上中下故當知有樂下受樂者釋  
提桓因中受樂者大梵天王上受樂者大自在  
天以有如是上中下故當知有樂世尊有諸外  
道復言有淨何以故若無淨者不應起欲若起  
欲者當知有淨又復說言金銀珍寶琉璃頗梨  
碑渠碼碯珊瑚真珠璧玉珂貝流泉浴池飲食  
衣服華香味香塗香燈燭之明如是等物悉是

淨法復次有淨謂五陰者即是淨器盛諸淨物  
所謂人天諸仙阿羅漢辟支佛菩薩諸佛以是  
義故名之爲淨世尊有諸外道復言有我有所  
覩見能造作故譬如有人入陶師家雖復不見  
陶師之身以見輪繩定知其家必是陶師我亦  
如是眼見色已必知有我若無我者誰能見色  
聞聲乃至觸法亦復如是復次有我云何得知  
因相故知何等爲相喘息視眴壽命役心受諸  
苦樂貪求瞋恚如是等法悉是我相是故當知  
必定有我復次有我能別味故有人食果見已  
知味是故當知必定有我復次有我云何知耶  
執作業故執鎌能刈執斧能斫執瓶盛水執車

能御如是等事我孰能作當知必定而有我也  
復次有我云何知耶即於生時欲得乳哺乘宿  
習故是故當知必定有我復次有我云何知耶  
和合利益他衆生故譬如瓶衣車乘田宅山林  
樹木象馬牛羊如是等物若和合者則有利益  
此內五陰亦復如是眼等諸根有和合故則利  
益我是故當知必定有我復次有我云何知也  
有遮法故如有物故則有遮礙物若無者則無  
有遮若有遮者則知有我是故當知必定有我  
復次有我云何知也伴非伴故親與非親非是  
伴侶正法邪法亦非伴侶智與非智亦非伴侶  
沙門非沙門婆羅門非婆羅門子非子晝非晝

夜非夜我非我如是等法爲伴非伴是故當知  
必定有我世尊諸外道等種種說有常樂我淨  
當知定有常樂我淨世尊以是義故諸外道等  
亦得說言我有具諦佛言善男子若有沙門婆  
羅門有常有樂有淨有我者是非沙門非婆羅  
門何以故迷於生死離一切智大導師故如

沙門婆羅門等沈沒諸欲善法羸損故是諸外  
道繫在貪欲瞋恚癡獄堪忍愛樂故是諸外道  
雖知業果自作自受而猶不能遠離惡法是諸  
外道非是正法正命自活何以故無智慧火不  
能消故是諸外道雖欲貪著上妙五欲貧於善  
法不勤脩故是諸外道雖欲往至正解脫中而



持戒足不成就故是諸外道雖欲求樂而不能  
求樂因緣故是諸外道雖復憎惡一切諸苦然  
其所行未能遠離諸苦因緣是諸外道雖爲四  
大毒蛇所纏猶行放逸不能謹慎是諸外道無  
明所覆遠離善友樂在三界無常熾然大火之  
中而不能出是諸外道遇諸煩惱難愈之病而  
復不求大智良醫是諸外道方於未來當涉無  
邊險遠之路而不知以善法資糧而自莊嚴是  
諸外道常爲淫欲災毒所害而反抱持五欲霜  
毒是諸外道瞋恚熾盛而復反更親近惡友是  
諸外道常爲無明之所覆蔽而反推求邪惡之  
法是諸外道常爲邪見之所誑惑而反於中生

親善想是諸外道希食甘果而種苦子是諸外道已處煩惱闇室之中而反遠離大智炬明是諸外道患煩惱渴而復更飲諸欲鹹水是諸外道漂沒生死無邊大河而復遠離無上船師是諸外道迷惑顛倒言諸行常諸行若常無有是處善男子我觀諸行悉皆無常云何知耶以因緣故若有諸法從緣生者則知無常是諸外道無有一法不從緣生善男子佛性無生無滅無去無來非過去非未來非現在非因所作非無因作非作非作者非相非無相非有名非無名非名非色非長非短非陰界入之所攝持是故名常善男子佛性即是如來如來即是法法即是

是常善男子常者即是如來如來即是僧僧即  
是常以是義故從因主法不名爲常是諸外道  
無有一法不從因生善男子是諸外道不見佛  
性如來及法是故外道所可言說悉是妄語無  
有真諦諸凡夫人先見瓶衣車乘舍宅城郭河  
水山林男女象馬牛羊後見相似便言是常當  
知其實非是常也善男子一切有爲皆是無常  
虛空無爲是故爲常佛性無爲是故爲常虛空  
者即是佛性佛性者即是如來如來者即是無  
爲無爲者即是常常者即是法法者即是僧僧  
即無爲無爲者即是常善男子有爲之法凡有  
二種色法非色法非色法者心心數法色法者

地水火風善男子心名無常何以故性是攀緣  
相應分別故善男子眼識性異乃至意識性異  
是故無常善男子色境界異乃至法境界異是  
故無常善男子眼識相應異乃至意識相應異  
是故無常善男子心若常者眼識應獨緣一切  
法善男子若眼識異乃至意識異則知無常以  
法相似念念生滅凡夫見已計之爲常善男子  
諸因緣相可破壞故亦名無常所謂因眼因色  
因明因思惟生於眼識耳識生時所因各異非  
眼識因緣乃至意識異亦如是

耽

切丁  
含

酒

切彌  
免

瘵

息音

彗

切祥  
歲

螫

切聲  
隻

蓋

切呵  
各

疽

切七  
余

痍

夷音

偃

切於  
件

驃

切毗  
妙

紫

切桑  
河

鉗

切目  
炎

鏢

切蘇  
果

鎗

當音

斐

切余  
職

捲

負居  
阮戶

刈

切魚  
吠

鍛

切端  
亂

紐

切尼  
肘

喘

切充  
免

瞬

瞬音

鎌

切獵  
沾

哺

步音

鹹

咸音

猪飼長治亭附



Handwritten marks or signatures at the bottom of the page, including a large character that appears to be '大' (Great) and other smaller characters.